



www.facebook.com/syrboyi.kz/

www.instagram.com/syrboyi_kz

https://twitter.com/syrboyi

t.me/syrboyi_kz


4 Жекеменшік жатақханалар саны артады



5 Обыр неге өршіп тұр?



6 Жұмыспен қамтуға жәрдемдесудің белсенді шаралары



8 Өлеңдегі өр болмыс



● ПРЕЗИДЕНТ



Бірқатар міндет айқындалды

Президент Жоғарғы Сот төрағасы Жақып Асановты қабылдады.

Мемлекет басшысына сот жүйесінің қазіргі жағдайы мен сот төрелігіне қатысты өзекті мәселелер туралы ақпарат берілді.

Жақып Асановтың айтуынша, былтыр аудандық соттар шығарған 1,2 миллион сот шешімінің 1,4 пайызын немесе 17 мың істі жоғарғы сағыдағы соттар кері қайтарған немесе өзгерткен.

Қасым-Жомарт Тоқаевқа 2021 жылдың 1 шілдесінен бастап жұмыс істей бастаған өкімшілік соттардың қызметі туралы мәлімет берілді. Жарты жылда соттарға 14 мың талап арыз түскен. Мемлекеттік органдар әрбір екінші істе ұтылған. Бұрын қаралған істердің 85 пайызы мемлекеттік органдардың пайдасына шешілген.

Президентке дауларды шешудің баламалы тәсілдері туралы баяндалды. Әкімдіктермен бірлесіп отырып, жергілікті жерлерде соттан тыс медиация орталықтары құрылған. Соттар дау-дамайлардың мәмілеге келу арқылы шешілуіне көмектеседі. Бұрын тараптардың тек 3 пайызы ғана татуласса, қазір бұл көрсеткіш 34 пайызға жеткен.

Жоғарғы Сот төрағасы қылмыстық сот төрелігі саласында да ахуалдың өзгеріп жатқанын баяндады. Оның айтуынша, соттарда кінәлауға бейім тұру ісі тыйылып келеді. Соңғы 4 жылда ауыр және аса ауыр қылмыстар бойынша ақталғандар саны 7 есе (жылына 20-30-дан 200-ге дейін) көбейген.

Кездесу қорытындысы бойынша Мемлекет басшысы сот органдарын жаңғырту аясында жүзеге асырылатын бірқатар міндетті айқындап берді.

Тапсырма қалай орындалуда?

Мемлекет басшысы Қасым-Жомарт Тоқаев «QazaqGaz» ҰК» АҚ Басқарма төрағасы Санжар Жаркешовті қабылдады.

Президентке ұлттық газ компаниясының қазіргі жұмысы туралы және ішкі нарықты тауарлы газбен қамтамасыз етуге басымдық беру жөніндегі тапсырмасының орындалу барысы баяндалды.

Санжар Жаркешов газ саласын дамытудың кешенді жоспарының әзірленуі жөнінде баяндады. Аталған жоспар ресурстық базаны кеңейтуді және еліміздегі газ тасымалдау инфрақұрылымын жаңғыртуды көздейді.

Мемлекет басшысына сатып алу жүйесінің ашықтық деңгейін арттыру жөнінде берген тапсырмаларының орындалу барысы, сондай-ақ ұлттық компанияның кадр саясатындағы өзгерістер жөнінде ақпарат берілді.

Кездесуде құбылмалы геосаяси жағдайға байланысты туындайтын сын-қатерлерді енсеруге бағытталған дағдарысқа қарсы шаралар талқыланды.

Кездесу қорытындысы бойынша Президент ұсынған шешімдерді қолдап, толық аудит ұйымдастыру және компания қызметіндегі транспаренттілікті қамтамасыз ету жөнінде бірқатар тапсырма берді.

● САПАР

Әрбір сарапталған іс сынақтан алып шығады



Өткен аптада Қызылорда қаласы маңындағы ауылдарға барып, ондағы тұрғындар мәселесін тыңдаған облыс әкімі Гүлшара Әбдіқалықова жұмыс сапарын аудандарда жалғастырды. Облыс басшысы былтыр қуаңшылық зардабын тартқан Арал ауданында болып, шаруалармен кездесті. Сондай-ақ өңір басшысының жұмыс сапары Қазалыда жалғасып, су тапшылығының алдын алу және көктемгі вегетациялық кезеңдегі егу мәселелері бойынша жиын өткізді.

Erjan KOЖАСOV, «Сыр бойы»

Іссапар бойынша алдымен теңізді өлкеге барған аймақ басшысы аудандағы балық шаруашылығы саласындағы кәсіпкерлермен кездесіп, мамандармен пікірлесті. Естеріңізге салсақ, бұған дейін облыста балық шаруашылығын дамытудың 2021-2030 жылдарға арналған Жол картасы әзірленген еді. Осының аясында өнім экспорты мен тауарлы балық өсіру көлемін арттыру көзделген. Қосымша 500-ден астам жаңа жұмыс орны да ашылмақ.

«Көкарал» бөгеті іске қосылғалы ауданда балық шаруашылығы саласында оң қадамдар жетерлік. Қазір Кіші Арал су айдыны 18 учаскеге бөлінді, оның 11-і табиғат пайдаланушыларға 10 жыл мерзімге дейін бекітіліп берілді. Былтыр облыс бойынша балық аулау лимиті 7364 тонна болса, соның ең көп бөлігі Арал ауданына тиесілі. Ауданның өзінде 10 балық өңдеу зауыты бар, былтыр 3911 тоннасы он мемлекетке экспортқа шығарылды. Ең көп бөлігі Ресейге жіберілді. Бұған қоса, Польша, Грузия, Германия, Литва, Укра-

ина, тағы басқа сырт елдерге тасымалдануда, – дейді облыстық табиғат ресурстар және табиғат пайдалануды реттеу басқармасының басшысы Бауыржан Шәменов.

Аймақ басшысы табиғат пайдаланушылармен пікір алмасу барысында көлдерді тауарлы балық шаруашылығына бейімдеудің маңыздылығына тоқталды.

– Біз байлығымыз саналатын теңізді, ондағы балықты сақтауымыз керек. Тағы бір мәселе, ол – балық аулау әдісі. Оны қазіргі заманға сай етіп, шаруашылықтарға заңды түрде уәкелерді белгілеп алсақ, жаңа жұмыс орнын ашуға өз септігін тигізеді, – деді облыс әкімі.

Сонымен қатар аудандағы клубтар мен кітапханалар құрылысы, аудандық маңызы бар көшелерді қайта жаңғырту және темір жол үстіне салынатын аспалы көпір жобасы назарға ұсынылды. Сондай-ақ аудандағы тарихи-өлкетану музейі мен көпқабатты тұрғын үйлер салу мәселелері де назардан тыс қалмады.

– Ауданда апаттық жағдайда тұрған клубтар бары рас. Біз мұндай ғимараттарды қайта салуды біртіндеп іске асырамыз. «Ауыл – ел бесігі» жобасы аясында Аманөткел мен Бөген ауылына салынатын жаңа клуб ғимараттарының да жоба-сметалық құжаттары жақын арада мемлекеттік сараптамадан толық өтеді. Бұған қосымша аудан орталығындағы мәдениет орталығы мен өлкетану музейін қайта жабықтау үшін де қаржы қажет, – деді аудан әкімі Серік Сермағамбетов.

Сапар барысында облыс әкімі сала мамандарымен бірге ауыл шаруашылығы мәселелерін талқылауға арналған жиын өткізді. Онда аудан әкімі егін және мал шаруашылығы бағытында негізгі жұмыстарды айтса, су ресурстарын пайдалануды реттеу және қорғау жөніндегі «Арал-Сырдария» бассейндік инспекциясының басшысы Сейілбек Нұрымбетов облысқа келетін судың қазіргі жағдайы мен алдағы болжамы туралы баяндады. Сондай-ақ, көлдер жүйесін суландыру мен оларды сақтап қалу жайы қозғалды.

– Былтыр Кіші Арал теңізіне 3160 млн текше метр су түсуі болжанса, нақты түскен су көлемі 1194 млн текше метр. Арал ауданы аумағында орналасқан «Қамыстыбас» және «Ақшатау» көлдер жүйесін суландыру мақсатында Аманөткел ауылдық округі тұсынан Сырдария өзеніне уақытша бөгет салынғаны

белгілі. Осы бөгеттің көмегімен былтыр тамыз айынан бері жүргізіп отырған есебімізге сәйкес «Ақшақыз», «Аққой» каналдары арқылы «Ақшатау» көлдер жүйесіне 350 млн, «Жасұлан», «Қулы» каналдары арқылы «Қамыстыбас» көлдер жүйесіне 229 млн текше метр су түскен. Енді қазіргі қалыптасып отырған жағдай туралы айтар болсам, «Шардара» су қоймасындағы жиналған су көлемі 4,7 млрд текше метр ғана. Бұл «Көксарай» су реттегішімен қосқанда өткен жылмен салыстырғанда 0,9 млрд текше метрге аз, – дейді С.Нұрымбетов.

Кездесуде облыс әкімі вегетация кезеңінде судың аз келуіне байланысты тиімді тетіктерді қарап, суды аз қажет ететін дақылдар егуді алға тартты. Сондай-ақ, «Көкаралды» күрделі жөндеуден өткізу мәселесі де сөз болды.

– Бізге керегі – төрт түліктің басын аман сақтау және жоғарыдан түсетін су деңгейіне байланысты егін жұмыстарын мерзімінде бастау. Биыл да судың аз келуіне байланысты қарекетті қадамдарға шаруалармен бірге кірісуіміз қажет. Әкімдік тарапынан Жол картасы әзірленді. Картаға енген 65 жобаға Үкімет резервінен 3,6 млрд теңге бөлуге ҚР Қаржы министрлігінен келісім алынды. Сондай-ақ Үкімет резервінен барлығы 22 каналды тазалау, 41 ұңғыманы жөндеу және бұрғылау, 133 дана насос қондырғысын алуды жоспарлап отырмыз. Көлдерді суландыру мен балық шаруашылығына байланысты да мәселелер туындайтын жақсы түсінімін. Көрші мемлекетте болып жатқан жағдай да ауыл шаруашылығына, оның ішінде экспортқа тікелей әсер етеді. Дегенмен, бірігіп мәселелерді шешудің тиімді тетіктерін қарастырсақ, бұл қиындықтан да шығамыз, – деді жиын барысында облыс басшысы.

Осы ретте аудандағы шаруа қожалықтары өкілдерінің ұсыныс-пікірлерін тыңдалып, жауапты басқарма басшыларына бірнеше тапсырма берілді.

Қажетті жем-шөппен қамтамасыз ету, құдықтар мен скважиналарды қазуға жоба-сметалық құжаттар дайындау да тапсырылды. Сондай-ақ, егін егу науқаны басталмай тұрып Аралдағы көлдер жүйесін суландыруға байланысты тиісті жұмыстар жүргізу, биыл егілетін 200 гектар картоп, көкөніс, бақша және жоңышқа дақылдарын қажетті сумен қамтамасыз етуді ұйымдастыру жүктелді.

2-бет

● ПРЕСС-ТУР

Жаңақорған ауданында жергілікті бұқаралық ақпарат құралдары өкілдеріне арналған баспасөз туры өтті. Онда журналистер білім және ауыл шаруашылығы салаларында атқарылып жатқан жұмыстармен танысып қайтты.

Әділжан ҮМБЕТ, «Сыр бойы»

Жаңақорғандағы жаңашыл жобалар



Аудан орталығы тұрғындары жылдан-жылға көбейіп келеді. Кентте жаңадан үй салушылар қатарын молайтты. Қазір «Ипподром» және «Саяжай» бөлігінде 10 мыңға тарта адам тұрады. Дегенмен, бүгінге дейін балалар алыста

орналасқан мектептерге қатынап оқуға мәжбүр болды. Аталған мәселе тұрғындар тарапынан жиі қозғалатын. Көпшіліктің өтінішіне сәйкес енді бұл аумақта білім ордасы бой көтереді.

3-бет

● САУЛЫҚ - САҚТЫҚТА

Күреспен өткен екі жыл

Әлем мемлекеттерінің, оның ішінде біздің еліміздің де коронавирусы инфекциясымен күресіп келе жатқанына екінші жыл болды. Осыдан екі жыл бұрын, яғни, 2020 жылғы 16 наурызда Мемлекет басшысы Қасым-Жомарт Тоқаев республика көлемінде төтенше жағдай режимін енгізді. Содан бірнеше күн бұрын Дүниежүзілік денсаулық сақтау ұйымы коронавирусты пандемия деп жариялады, ал, алғашқы індет жұқтыру дерегі Нұр-Сұлтан және Алматы қалаларында тіркелген еді. Сол кезде төтенше жағдай 16 наурыздан бастап 15 сәуірге дейін созылады деп шешілді.

Айнұр БАТТАЛОВА, «Сыр бойы»

3-бет



